



Dr Vogt vom Schloss im Fäld

Dr Vogt im Fäld mit Schloss
Sitzt immer heecher uf sim Ross
eb Wartegg, Hürlimann, Gurte, Cardinal
die alli hän jetzt kai andri Wal
fertig isch dr Traum vom aigene Hopfe und Malz
in Rhyfælde heisst-s nim: Gott erhalts
im Gegedail: mir dien eych schliesse
nur no das dien mit begriesse
Iir dien-is nime intressiere
Bi uns din mir alles konzentriere
in Zuekunft dien mer nur no nä
und eych Alle nit me gä
dä Vogt gits nit nur in Rhyfælde hinde
nai, me kan-en hytte yberall finde
me erkennt-en am aifache dängge
jo niemerem ebbis verschängge
är duet immer numme nä
und jo nit imen-e andere ebbis gä
yygoo uff Ain wo anderscht duet dängge
wär jo scho ebbis verschängge
wichtig isch numme fir die Vögt im Fäld
s'Zämmeramisiere vom liebe Gäld
e mänge vo dääne Schlaue
duet nit numme Bierli braue
au uff de Bangge duet me die Vögt finde
z'Basel und in Ziri hinde
sogar in dr Chemie dien-si iir Unwäse triibe
und sich anderi Firme yyverliibe
d'Scheerholder mues me z'friide stelle
dorum verliere e huffe iiri Stelle
was mit dääne denn goot duet si nit interessiere
wichtig isch numme d'Gwinn z'optimiere
intressant isch s'vorzaige vone-re guete Bilanz
eb anderi dien hungere intressiert jo doch kai Schwanz
sig's dr Ebner, Vasella oder sunscht e soo-ne Fritz
die schiiche sich kai Bitz
si betriibe jetzte sogar e neye Sport
und verleen dr yygsässe alti Ort
geen dert aane go woone,
wo-s sich fir si besser duet loone
Stiire zaale wän si numme no glaini
oder am beschte yberhaupt grad kaini
als Vogt im Fäld
het me halt e huffe Gäld
dr Staat sell jetzt riibe
und vom Glaine s'Gäld yydriibe
wenn ain im andre nyt me will gä
und numme no will nä
denn isch är ebber in dr hyttige Wält
denn regiere duet jo nur no s'Gäld
me sait däm freyi Märtswirtschaft
wenn ain s'Dopplete und dr ander nit me macht
usser Gäld zämmeramisiere
und anderi ewägg rationalisiere
700 Joor fiilt me sich zrugghersetz
dr Glai wird widder ummeghetzt
e neye Tell sott me widder ha
oder sunscht e soon-e tapfere Ma
wo die Vögt vom Ross aabe duet schnelle
und si uusekejt die schlächte Gselle
as mer is nimm fir iir Gesinde mien halte
und die guet Moral kenne bhalte.
odder hesch Du di au fir dr ney Wäg entschiide
und dänggsch womeeglig das macht Die z'friide
wotsch au nur vo de Andere profidiere
und di esoo jetzte profiliere
wirsch au e Vogt mit Schloss im Fäld
und machsch nur no s'grossi Gäld
mainsch de duesch esoo d'Wirtschaft belääbe
denn bisch Du vellig dernääbe:
wie sell dr Anderi bi dir ebbis kaufe
wenn är fir's Gäld zem Arbetsamt mues laufe
alli die ooni Stelle
kenne nit me bi dir bschtelle
di bees Spiraale duet sich allewyl schnäller beweeye
de duesch die wääge däm denn sälber leege
so wie im Schloss im Fäld dr Vogt
wo uff sim hoche Ross in Rhyfælde hoggt ...